

Tauhi 'i he 'Api Hosipisi'

Ki ha tokotaha 'oku mo'ua 'i ha mahaki fakangata mo'ui pe ko ha mahaki 'oku 'ikai lava ke faito'o, 'e 'i ai 'a e taimi 'e fokotu'u atu ai 'e he 'ene GP pe toketā fakafāmilī' ke 'ave ki ha 'api hosipisi. Ko e talanoa ki he hosipisi' 'oku fa'a fakatupu manavahē mo puputu'u ki he kakai tokolahi. Ko e ma'u 'o e fakamatala felāve'i mo e tauhi 'i he 'api hosipisi' mo e ngaahi founga'e ala tokoni'i ai koe mo ho ngaahi 'ofa'anga' 'e malava ke faingofua ange ai 'a e sitepu ko 'eni'.

Ko e hā 'a e tauhi 'i he 'api hosipisi'?

Ko e hosipisi' 'oku ne teuteu'i ha tauhi'anga ke tokangaekina 'a kinautolu 'oku nau 'i he ngaahi tūkunga faka'osi'osi 'o ha mahaki 'oku 'ikai lava ke faito'o, 'o tokanga tāfataha ange ki he fakafiemālie' mo e mahu'inga 'o e mo'ui', 'i he faito'o'.

Ko e ngaahi ngāue 'a e hosipisi' 'oku fakatefito ki hono mapule'i 'o e langa' mo e ngaahi faka'ilonga mahaki kehekehe pea pehē ki he poupuu fakaeloto mo fakalaumālie 'o e tokotaha mahaki', honau ngaahi fāmilī/ kāinga' mo e kau tauhi'.

Neongo 'oku malava ke kehekehe 'a e ngaahi ngāue 'oku fai 'e he ngaahi 'api hosipisi', ka 'oku nau meimei fai kotoa 'a e:

- tauhi fakafaito'o mo fakaneesi
- tokoni ngāue fakasōsiale, fale'i mo e tokoni'i fakalaumālie
- ngaahi faito'o, kau ki ai 'a e fakamālohisino mo e ngaahi faito'o kehekehe
- tokanga'i 'o e lotomamahi'
- ako mo e ngaahi sēvesi ke tokoni'i 'a e ngaahi fāmilī/ kāinga' mo e kau tauhi'

Totongi 'o e tauhi 'i he 'api hosipisi'

'Oku 'ikai ke totongi 'a e tauhi mo e ngaahi ngāue 'i he ngaahi 'api hosipisi'.

'Oku ma'u 'a e konga lahi 'o e pa'anga 'a e ngaahi 'api hosipisi' mei he pule'anga'; kaneongo ia', ko e feinga pa'anga' 'oku mahu'inga 'aupito ia ki he feinga ke kei ta'etotongi 'a e ngaahi ngāue' ni.

Faingamālie ki he tauhi 'i he 'api hosipisi'

Ko e 'api hosipisi kotoa pē 'oku 'i ai 'enau ngaahi makatu'unga ke te kau ai ki ai, pea mo e founga ki hono fakahū ki ai ha taha. Talanoa ki ho'o toketā pe timi tauhi' pē 'e tokoni kiate koe pe ko hao 'ofa'anga ke 'ave ki ha 'api hosipisi pe 'ikai. Ki ha toe fakamatala felāve'i mo e ngaahi sēvesi 'a e 'api hosipisi 'i he feitu'u oku ke 'i ai', vakai ki he

www.hospice.org.nz

Ko e ngaahi fananga maheni fekau'aki mo e tauhi 'i he 'api hosipisi'

'Oku fiema'u ke ke hoko ko e mahaki 'i ha 'api hosipisi kae lava ke ke monū'ia 'i he 'enau ngaahi sēvesi'

Neongo 'oku lahi 'a e ngaahi 'api hosipisi 'oku nau faka'atā ke tauhi pē ai 'akinautolu 'oku nau fie nofo ai', ka 'oku 'i ai pē mo 'enau ngaahi sēvesi ke tokoni'i ha ni'ihi ke tauhi pē kinautolu 'i honau ngaahi 'api takitaha. 'Oku malava ke ngāue fakataha 'a e kau ngāue 'a e 'api hosipisi' mo e kau toketā fakafāmilī' pea mo e kau neesi fakavahe' 'i he komiuniti'.

'Oku tāfataha pē 'a e ngaahi 'api hosipisi' ki he tauhi fakafaito'o'

Ko e tauhi fakahosipisi' 'oku fai fakalūkufua ia, 'oku kau ai hono tokangaekina 'o e ngaahi fiema'u fakaesino, fakaeongo, fakalaumālie pea mo e fakasōsiale. Ko e timi 'a e kau mataotao kehekehe ('e lava 'o kau ki ai 'a e kau toketā, neesi, kau ngāue fakasōsiale, kau fale'i mo e kau faito'o) 'oku 'ikai ke ngata pē 'enau tauhi ki he tokotaha 'oku faka'osi'osi 'ene mo'ui', ka 'oku kau ai honau ngaahi fāmilī, kāinga' mo e ngaahi kaungāme'a'.

Ko ho'o hū pē ki ha 'api hosipisi' 'e 'ikai te ke toe 'atā

'Oku tokolahi 'a e kau mahaki 'oku nau ō ki he 'api hosipisi' kenau nofo taimi nounou pē, ke nau lava 'o mapule'i lelei ange 'a e langa' mo e ngaahi faka'ilonga mahaki', pe ko ha ngaahi 'aho si'i ke ma'u ha tokoni tauhi fakataimi, pea nau toki foki ki 'api. Ko e tauhi fakataimi' 'oku fai ia 'e he ngaahi 'api hosipisi' 'e ni'ihi kae lava 'a e ngaahi fāmilī/ kāinga' mo e kau tauhi' 'o ki'i mālōlō mei honau ngaahi fatongia fakatauhi'.

Ko e 'api hosipisi' 'oku 'atā pē ia ki he ni'ihi 'oku mo'ua 'i he mahaki kanisā'

Neongo ko e tokolahi 'o e kau mahaki 'oku nau ngāue'aki 'a e ngaahi sēvesi 'a e 'api hosipisi' 'oku nau ma'u 'a e mahaki kanisā, ka 'oku 'atā 'a e ngaahi sēvesi ko 'eni' ki ha taha 'oku mo'ua 'i ha mahaki 'oku 'ikai lava ke faito'o. 'E malava ke kau heni 'a kinautolu 'oku nau ma'u 'a e ngaahi mahaki 'o e neave', mole lahi 'a e manatu' pē ta'e'aonga honau kofuua', mafu' pe ma'ama'a'.